

Dagangan Malaysia catat lebih RM2 trilion tiga tahun berturut-turut

**Merosot
7.3 peratus
berbanding 2022
akibat pelbagai
faktor globalisasi**

Oleh Mahanum Abdul Aziz
mahanum_aziz@bh.com.my

Perdagangan Malaysia pada 2023 melepasi aras RM2 trilion bagi tiga tahun berturut-turut berjumlah RM2.637 trilion meskipun berdepan dengan landskap ekonomi global yang tidak menentu.

Jumlah dicatatkan itu, bagaimanapun merosot 7.3 peratus berbanding 2022, sejajar dengan pengurangan permintaan global, harga komoditi lebih rendah,

ketegangan geopolitik berpanjangan, kadar inflasi tinggi, penurunan dalam kitaran semikonduktor dunia serta kesan asas yang tinggi direkodkan pada tahun lalu.

Eksport terus melebihi aras RM1 trilion untuk tahun ketiga berturut-turut dan mencapai 82.4 peratus daripada unjuran yang ditetapkan bagi 2025 di bawah Kajian Separuh Penggal Rancangan Malaysia Ke-12 (RMK12) meskipun jumlahnya menguncup lapan peratus kepada RM1.426 trilion pada 2023.

Sementara itu, import bagi 2023 mencatat satu lagi pencapaian baharu dengan melepasi aras RM1 trilion untuk kali kedua, namun pengurangan sebanyak 6.4 peratus kepada RM1.212 trilion berbanding 2022.

Malaysia mengekalkan lebihan dagangan yang ke-26 tahun berturut-turut sejak 1998, bernilai RM214.1 bilion.

Kementerian Pelaburan, Perdagangan dan Industri (MITI) berkata, landskap ekonomi global yang mencabar pada 2023 telah memberi kesan kepada perdagangan antarabangsa termasuk prestasi perdagangan Malaysia yang mencatatkan pengurangan.

"Ini dilihat selari dengan rakan dagang utama yang lain seperti China, Taiwan, Korea dan Indonesia yang turut mencatatkan pertumbuhan perdagangan negatif," katanya dalam satu kenyataan.

Pada 2023, rakan dagang utama Malaysia adalah ASEAN, China, Amerika Syarikat (AS), Kesatuan Eropah (EU) dan Jepun yang mewakili 67.7 peratus syer daripada jumlah perdagangan Malaysia.

Rekod kenaikan eksport

Walaupun prestasi eksport dicatat lemah pada 2023, kenaikan eksport ketara direkodkan ke

beberapa pasaran baharu seperti Kenya, Brazil, Nigeria, Tanzania, Yaman, Maghribi, Puerto Rico, Namibia dan Kyrgyzstan.

Eksport ke beberapa pasaran Perjanjian Perdagangan Bebas (FTA) turut merekodkan pertumbuhan terutamanya ke Republik Korea (ROK), Australia, Mexico, Türkiye dan New Zealand meskipun eksport keseluruhan ke negara rakan dagang FTA menyusut.

Di samping pemulihan perdagangan global, FTA, khususnya Perkongsian Komprehensif Ekonomi Serantau (RCEP) dan Perjanjian Komprehensif dan Progresif bagi Perkongsian Trans-Pasifik (CPTPP) dijangka akan memperluaskan lagi prospek positif bagi perdagangan luar Malaysia.

Dalam masa yang sama, Pelan Induk Perindustrian Baharu 2030 (NIMP 2030) turut memberi penekanan kepada peningkatan dalam penggunaan FTA dalam

kalangan pengeksport Malaysia.

Eksport Malaysia pada 2023 didominasi oleh barangan elektrik dan elektronik (E&E) yang merangkumi 40.4 peratus bahagian daripada jumlah eksport, merekodkan pengurangan berbanding tahun sebelumnya.

Meskipun kitaran sektor semikonduktor dunia mengalami penurunan, eksport negara bagi peranti semikonduktor dan litar bersepadu elektronik (IC) meningkat.

Mengorak langkah ke hadapan, kerajaan akan terus memperkasakan aktiviti promosi perdagangan antarabangsa agar dapat memperkukuhkan lagi daya tahan perniagaan seterusnya mengekalkan momentum pertumbuhan ekonomi.

Ia akan turut disokong inisiatif oleh di bawah Kajian Separuh Penggal RMKe-12, Pelan Tindakan Perdagangan Nasional (NTBP) dan NIMP 2030.

